

Die Hertzogprys

Hoe weet 'n mens dat jy 'n uitstekende skrywer, digter of **dramaturg** in Afrikaans is? Wel, jy wen 'n Hertzogprys.

Die Hertzogprys word as die kroonprys van alle **letterkunde**pryse in [Afrikaans](#) beskou. Dit is die prys wat jaarliks deur die Suid-Afrikaanse Akademie vir Wetenskap en Kuns (voorheen genoem die Suid-Afrikaanse Akademie vir Taal, Lettere en Kuns) aan mense toegeken word. ¹



Die prys het sy naam aan generaal [J.B.M Hertzog](#) te danke. Hy was 'n voormalige eerste minister van [Suid-Afrika](#) (vandag sou dit president wees), en hy was 'n groot kampvegter vir taal. ² As ons sê iemand is 'n kampvegter vir Afrikaans, beteken dit dat hy of sy vir Afrikaans veg of stry. ³

Die Hertzogprys het in 1914 tot stand gekom. Die digter Totius was die eerste wenner van hierdie prys vir sy bundel *Trekkersweë*, wat in 1915 uitgegee is.



In 1916 is die Hertzogprys (wat jaarliks om die beurt vir drama, poësie of prosa toegeken word) aan Totius toegeken vir sy digbundel *Trekkerswee*. Die eerste gedig daarin is getiteld "Silwer strale". Die eerste strofe daarvan lui: "Dis heuwels, heuwels net / sover 'n mens se oog kan spur: / grasheuwels waar ook riwwe gaan, / met enkele stroompies tussendeur."

Die prys se kategorieë is **poësie**, **prosa** en [drama](#), en die prys word jaarliks om die beurt vir hierdie genres toegeken. Dit beteken dat 'n prosawenner een jaar die prys kan wen, die volgende jaar 'n digter (wat [poësie](#) skryf) en die jaar daarna weer 'n dramaturg (wat toneeltekste skryf). ²



Waar kom die wedstryd vandaan?

Die prysgeld is deur generaal Hertzog bewillig. Hy het reeds in 1914 'n skenking van 1 200 pond daarvoor gemaak en het op 27 Mei 1914 'n *notariële skenkingsakte* onderteken. 'n Notariële skenkingsakte is 'n dokument waarin iemand die voorwaardes vir sy of haar skenking en die aanwending daarvan uiteensit. Dit word dan ook deur 'n notaris onderteken. Hertzog was hof toe omdat hy graag wou hê dat Hollands in Vrystaatse skole onderrig moes word.

Ná daardie hofsaak het Hertzog 'n lastersaak gewen. Nadat daar geld aan hom toegeken was, is sy regs-koste betaal, en die geld wat oorgebly het, is geskenk. Dit is onder beheer van die Akademiesraad geplaas sodat dit belê kon word. Hertzog wou graag hê dat die rente daarvan vir 'n letterkundige prys gebruik moes word. Die wedstryd het aanvanklik bepaal dat mense hul skryfwerk moes instuur, waarna dit gekeur moes word, maar daar is in 1923 besluit om alle gepubliseerde werke in aanmerking te neem. In 1928 is daar ook besluit dat prosa, poësie en drama om die beurt kans moet kry om in aanmerking vir die prys te kom. ²



Net Hertzog kon tydens sy leeftyd veranderinge aan die wedstryd maak, maar ná sy dood, kon die Akademie besluite maak, maar net as die hele raad saamstem.

Die wedstryd het deur die jare verander, en in 1943 is daar byvoorbeeld 'n prys vir wetenskaplike prosa toegeken. Prof J. du P. Scholtz is met die Hertzogprys vir sy skryfwerk, *Die Afrikaner en sy taal*, **bekroon**. Dieselfde het in 1944 gebeur toe dr. Coenraad Beyers vir *Die Kaapse Patriotte* gewen het. Die afdeling vir wetenskaplike prosa is egter in 1946 afgeskaf, maar die Akademieprys vir geesteswetenskappe het die volgende jaar ontstaan. ²

Die Akademie het ook besluit om die prysgeld te verhoog, maar het in 1966 besluit om by Hertzog se skenking se reëls te bly. Daarvolgens kon wenners slegs die rente op die kapitaal van die geld wen.

Só het die prysgeld dus elke jaar verskil. Die prys was byvoorbeeld in 1974 slegs R900, maar later het wenners ook 'n goue medalje gekry.

Die prysgeld beloop tans R75 000 wat deur die Sondagkoerant *Rapport* geborg

word.

Wie was generaal Hertzog?

Generaal Hertzog se volle name was James Barry Munnik Hertzog, en hy is in 1866 naby Wellington in die Boland gebore. Hy het regte studeer en later ook 'n doktorsgraad aan die Universiteit van Amsterdam in Nederland behaal. Hy was onder meer 'n advokaat en regter in Bloemfontein en het ook tydens die [Anglo-Boereoorlog](#) geveg. Hy was 'n kommandant in die oorlog. Hertzog was later prokureur-generaal van die Oranjerivierkolonie en medestigter van 'n Afrikanerparty.



Met die dat [Suid-Afrika](#) 'n unie geword het, is Hertzog as een van die ministers in die **kabinet** aangestel. Hy en die destydse eerste minister generaal [Louis Botha](#) het egter baie van mekaar verskil, en hy het later sy eie party, die Nasionale Party (Nasionale Party) gestig. Sy party het teen 1921 die grootste party in die land geword, en teen 1924 het hy die eerste minister van Suid-Afrika geword. Probleme het ontstaan toe die kabinet moes stem oor of hulle aan die [Tweede Wêreldoorlog](#) moes deelneem en hy het later bedank. Ná sy bedanking het hy onder meer 'n Volksparty gestig en later weer die Herenigde Nasionale Party. Hy is in 1942 oorlede. ⁴

Hertzog was baie trots op Afrikanerskap en was daarteen gekant dat Engels die hooftaal in die land moes wees. Hy het daarop aangedring dat Engels en Nederlands gelyk moet wees. ⁴



Hertzogpryswenner

Poësie

1916 - Totius (*Trekkersweë*)

1926 - [A.G. Visser](#) (*Gedigte*)

1928 - A.G. Visser (*Rose van herinnering*); C.M. van den Heever (*Die nuwe boord*)

1934 - Totius (*Passieblomme*); C.L. Leipoldt (*Skoonheidstroos*); [W.E.G. Louw](#) (*Die ryke dwaas*)

1937 - I.D. du Plessis (*Vreemde liefde en Ballades*); [N.P. van Wyk Louw](#) (*Alleenspraak*)

1940 - N.P. van Wyk Louw (*Die halwe kring*)



N.P. van Wyk Louw

1943 - [Elisabeth Eybers](#) (*Die stil avontuur en Belydenis in die skemering*)

1947 - [D.J. Opperman](#) (*Heilige beeste*)

1951 - Toon van den Heever (*Gedigte 1919, omgewerk tot Eugène en ander gedigte in 1931*)

1962 - Ernst van Heerden (*Die klop*)

1965 - N.P. van Wyk Louw (*Tristia*)

1968 - [Boerneef](#) (postuum) (al sy digbundels)

1971 - Elisabeth Eybers (*Onderdak*)

1974 - [Uys Krige](#) (*Uys Krige: 'n keur uit sy gedigte*)

1977 - Wilma Stockenström (*Van vergetelheid en van glans*)

1980 - D.J. Opperman (*Komas uit 'n bamboesstok*)

1983 - Sheila Cussons (al haar digbundels)

1984 - Breyten Breytenbach (*Yk*)

1987 - T.T. Cloete (*Idiolek en Allotroop - sy ander werke, Jukstaposisie en Angelliera*, is ook eervol vermeld met die toekenning)

1990 - Antjie Krog (*Lady Anne*)

1993 - T.T. Cloete (*Met die aarde praat*)

1996 - Ina Rousseau (*'n Onbekende jaartal*)

1999 - Breyten Breytenbach (*Oorblyfsels: 'n Roudig en Papierblom*)



Breyten Breytenbach

2002 - Henning Pieterse (*Die burg van hertog Bloubaard*)

2005 - Petra Müller (*Die aandag van jou oë*)

2008 - Breyten Breytenbach (*Die windvanger*)

2011 - Johann de Lange (*Die algebra van nood*)

2014 - Marlene van Niekerk (*Kaar*)

2017 - Antjie Krog (*Mede-wete*)



Antjie Krog

2020 - Johan Myburg (*Uittogboek*)

2023 - Antjie Krog (*Plunder*)

Drama

1926 - J.F.W. Grosskopf (*As die tuig skawe en Drie eenbedrywe*)

1935 - H.A. Fagan (*Die ouderling en ander toneelstukke*)

1944 - C. Louis Leipoldt (*Die heks en Die laaste aand*)



C. Louis Leipoldt

1952 - Gerhard Beukes (*Langs die steiltes, Salome dans, As ons twee eers getroud is en Agt eenbedrywe*); W.A. de Klerk (*Die jaar van die vuur-os, Drie*

vroue, Drie dramas en Vlamme oor La Roche)

1956 - D.J. Opperman (*Periandros van Korinthe*)

1960 - N.P. van Wyk Louw (*Germanicus*)

1969 - D.J. Opperman (*Voëlvry*)

1972 - [P.G. du Plessis](#) (*Siener in die suburbs* en *Die nag van Legio*)

1978 - [Bartho Smit](#) (*Putsonderwater, Moeder Hanna, Christine en Die verminktes*)

1981 - Henriette Grové (*Ontmoeting by Dwaaldrif* en al haar ander dramatiese werk)

1985 - Uys Krige (totale oeuvre)

1991 - Chris Barnard (totale oeuvre)

1994 - Reza de Wet (*Vrystaat-trilogie* en *Trits: Mis, Mirakel, Drif*)

1997 - Reza de Wet (*Drie susters twee*)

2000 - André P. Brink (*Die Jogger*)



André P. Brink

2003 - Pieter Fourie (totale drama-oeuvre)

2006 - Deon Opperman (vir sy drama-oeuvre tot 2005)

2009 - Deon Opperman (*Kaburu*)

2012 - Adam Small (vir sy drama-oeuvre)

2015 - Tertius Kapp (*Rooiland* en *Oorsee*)

2018 - Pieter-Dirk Uys (*Stukke teater* met inagneming van drama-oeuvre)

2021 - Nicola Hanekom (*In glas*)



Nicola Hanekom

Prosa

1917 - Jochem van Bruggen (*Teleurgestel*)

1920 - Leon Maré (*Ou Malkop*)

1925 - Jochem van Bruggen (*Ampie: die natuurkind*)

1926 - D.F. - Malherbe (*Die meulenaar*)

1927 - Jochem van Bruggen (*Ampie: die meisiekind*); [C.J. Langenhoven](#) (*Skaduwees van Nasaret*); Sangiro (*Diamantkoors* en *Twee fortuinsoekers*)

1930 - D.F. Malherbe (*Hans-die-Skipper*); G.C. en S.B. Hobson (*Kees van die Kalahari*)

1933 - Jochem van Bruggen (*Die sprinkaanbeampte van Sluis*)

1936 - Mikro (*Toiings* en *Pelgrims*)

1939 - D.F. Malherbe (*Saul die worstelheld* en *Die profeet*)

1942 - C.M. van den Heever (*Laat vrugte*)

1945 - Sangiro (al sy prosawerk)

1953 - [M.E.R.](#) (al haar prosawerk)



M.E.R.

1957 - Elise Muller (*Die vrou op die skuit*)

1958 - N.P. van Wyk Louw (vir kritiese prosa en die volgende essays: *Die mens agter die boek*, *Maskers van die erns*, *Lojale verset* en *Berigte te velde*)

1961 - [F.A. Venter](#) (*Swart pelgrim* en *Geknelde land*)

1964 - Etienne Leroux (*Sewe dae by die Silbersteins*)

1970 - [Karel Schoeman](#) (*By fakkellig, 'n Lug vol helder wolke en Spiraal*)

1973 - Chris Barnard (*Mahala en Duiwel-in-die-bos*)

1976 - Anna M. Louw (*Kroniek van Perdepoort*)

1979 - Etienne Leroux (*Magersfontein, O Magersfontein!*)

1982 - Hennie Aucamp (al sy prosawerk)



Hennie Aucamp

1984 - Henriette Grové (*Die kêrel van die Pêrel*)

1986 - Karel Schoeman (*'n Ander land*)

1989 - Etienne van Heerden (*Toorberg*)

1992 - Wilma Stockenström (*Abjater wat so lag*)

1995 - Karel Schoeman (*Hierdie lewe*)

1998 - Elsa Joubert (*Die reise van Isobelle*)

2001 - André P. Brink (*Donkermaan*)

2004 - Ingrid Winterbach (*Niggie*)

2007 - Marlene van Niekerk (*Agaat*)

2010 - Etienne van Heerden (*30 nagte in Amsterdam*)

2013 - Ingrid Winterbach (*Die aanspraak van lewende wesens*)

2016 - Willem Anker (*Buys: 'n Grensroman*)

2019 - Fanie Naudé (*Die derde spoel*)

2022 - S.J. Naudé (*Dol heuning*)



Sangiro wen die Hertzogprys in 1945 vir al sy prosawerk.

Wetenskaplike Prosa

1943 - J. du P. Scholtz (*Die Afrikaner en sy taal*)

1944 - Coenraad Beyers (*Die Kaapse Patriotte*)⁵



Woordbank

bekroon	Iemand se besondere prestasie word uitgelig, en hy of sy word daarvoor vereer. ³
dramaturg	Dis iemand wat dramas oftewel toneelstukke skryf. ³
kabinet	Ministers wat die regering van 'n land vorm. ³
kampvegter	Dis iemand wat stry of veg vir 'n saak wat vir hom belangrik is. ³
kapitaal	'n Groot som geld wat jy besit en wat jy kan belê om rente te verdien.
letterkunde	Dis kuns in 'n geskrewe vorm.
poësie	Die werke van digters of 'n versameling gedigte. ³
prosa	Geskrewe taalgebruik, veral as letterkundige genre. ³

Lees hierdie artikels om nog meer te leer oor die Hertzogprys

- [Meer oor die Hertzogprys](#)
- [Die Hertzogprys](#)
- [Profiel van generaal Hertzog](#)

Kyk na hierdie video's om nog meer te

leer oor die Hertzogprys

Antjie Krog se toespraak as Hertzogpryswenner

Dramaturg Pieter Fourie ontvang die Hertzogprys

Meer oor Totius, die eerste wenner van die Hertzogprys